



Komunikado di prensa nr. 2019-045

Apertura di Luna di Edukashon Finansiero di CBCS

Willemstad – E luna aki a marka komienso di e promé Luna di Edukashon Finansiero organisá pa Centrale Bank van Curaçao en Sint Maarten (CBCS). Den kuadro di esaki, CBCS ta kolaborando ku Fundashon Negoshi Pikiña (FNP) en bista di e ekspertisio, eksperensia i éksito di e organisashon akí riba tereno di edukashon finansiero i lantamentu di empresa. E luna aki, e meta ta pa papia mas ampliamente posibel riba tema relashoná ku finansa personal, ku atenshon spesial pa outosufisiensi finansiero den komunidad. Tambe lo para ketu na e importansia di CBCS pa nos sistema finansiero i pa komunidad en general.

Durante Luna di Edukashon Finansiero, di dia 1 te ku dia 30 di novèmber, lo organisá evento pa alumno di skol di fundeshi i skol sekundario, studiante, empresario i públiko general. Den e promé dos simanan, lo tene lèsnan interaktivo na diferente skol di fundeshi, presentá pa personal di CBCS. Algun tópiko lo wòrdu tratá ta: (1) e evolushon di sèn (e.o. merkado di interkambio i e importansha di sèn), (2) e funshon di sèn (modo di interkambio, spar, i konta), (3) e funshon di CBCS (e.o. e diferensha entre un banko sentral i un banko komersial) i (4) sèn ta hasibu felis? E charlanan aki ta forma parti di e proyekto mas amplio “Nos Komunidad” di FNP, den kual varios empresario, empleado i mayornan di mucha ta duna charla.

Den e di tres siman di e luna aki CBCS ta sostené diferente aktivitat den kuadro di Global Entrepreneurship Week (GEW), pa motibu ku edukashon riba nivel empresarial tambe ta parti di edukashon finansiero. Durante di e siman aki e skolnan di fundeshi ku a partisipá den e proyekto “Nos Komunidad” ta risibí nan sertifikado di partisipashon. Nietu di e legendario Nelson Mandela, señora Swati Mandela, tambe lo duna un diskurso inspirativo den e siman aki.

Den e último siman di novèmber alumnonan di skol sekundario i studiantenan di universidat lo tene un debate. E ponensianan riba kual nan lo debatí lo tin di haber ku: (1) ekonomia, (2) maneho empresarial i (3) edukashon finansiero. Aabes CBCS ta organisá un wèbinar ku koperashon di University of Curacao (UoC) tokante di konosementu finansiero i maneho empresarial. Durante di e wèbinar 3 studiante universitario lo presentá resultadonan di investigashon, sigui pa un diskushon riba esaki ku otro studiantenan den region Karibense, Latino Amerika i Europa.

Mediante e proyekto akí, CBCS ke hasi un kontribushon positivo na outosufisiensi finansiero i komportashon finansieramente responsabel den komunidad di Kòrsou i di Sint Maarten.

Pa mas formashon tokante Luna di Edukashon Finansiero i otro aktivitatnan organisá pa CBCS den kuadro di edukashon finansiero, kontaktá CBCS libremente via e-mail na: info@centralbank.cw.

CBCS ta invitá un i tur pa bishitá su wèpsait na <https://www.centralbank.cw/education> i su página di Facebook ofisial pa keda na altura di tur evento organisá.

Willemstad, 13 di novèmber 2019
CENTRALE BANK VAN CURAÇAO EN SINT MAARTEN



